

21/04/1999

Kejayaan negara dalam CD-ROM multimedia

INSTITUT Strategi dan Kepimpinan Asia (Asli) berjaya menghasilkan CD-ROM dan VCD "Mahathir: CEO Malaysia Inc", sumber rujukan mengenai Perdana Menteri, Datuk Seri Dr Mahathir Mohamad dalam format multimedia.

Penghasilannya juga sebagai memaparkan pencapaian dan kepemimpinan Dr Mahathir sepanjang 17 tahun lalu. Turut diselitkan dalam CD-ROM berharga RM60 itu ialah perbincangan mengenai kebangkitan dan kejayaan Malaysia melalui kepemimpinan strategik Dr Mahathir.

Dilancarkan oleh Timbalan Perdana Menteri, Datuk Seri Abdullah Ahmad Badawi, CD-ROM itu turut merangkumi 35 ucapan penting Dr Mahathir serta pandangan daripada rakan politik selain matlamat dan hasrat beliau di masa depan.

Aspek menarik pada produk itu ialah temuramah eksklusif sejam dengan Dr Mahathir yang didigitalkan dalam format VCD.

Temuramah pertama kali seperti itu pernah dilakukan, Dr Mahathir menyentuh mengenai hasrat dan cita-cita bangsa Melayu, Wawasan 2020, nilai kekeluargaan dan agama, generasi masa depan dan kepemimpinan di abad baru.

CD-ROM itu menurut Ketua Pegawai Eksekutif Asli, Datuk Michael Yeoh, adalah bahan sumber dan penyelidikan terbaik kepada pengguna untuk mempelajari lebih lanjut mengenai Malaysia selain kepada mereka yang berminat terhadap isu kepimpinan dan pengurusan.

"Adalah penting untuk seorang rakyat Malaysia memiliki CD-ROM itu," katanya. Asli turut menyumbang 50 set CD-ROM itu kepada Kementerian Pendidikan dan Kementerian Luar.

(END)